

A KINGIEMKHIET LEENG JESU

Text: Mak 11: 1-10

Pro. Pastor Khupsianlal

1.Thupatna:

Jerusalem alut masangin Mangpa Jesu khun anuazuite mini sawl in akung uah, “Na mai zawn ua khuo ah vapei unlen, na lut tah chieng un, sabiltung nou kikhi, atunga koima tuon ngailouna khat na mu ding ua, tuakhu hing sut unlen hing kai un. Tualeh mi koi ahiei in na kung ua, bang dinga na sut uh ahiei? ahing chi leh ‘Mangpa’n atulmaw hi,’ tammun ah ahing koi kia pai na ding hi,” chi un achi hi.

‘Mangpa’n atulmaw hi’ chia nuazuite’n aneitude adawngding dan uh hil hi. Mangpa Jesu genbangin nuazuite’n vabawl ua, apoimaw zilin tuabangma in dawnna pie in sabiltung nou koima tuonkhah nailou hing kai in atungah apuonte uh apha ua, tualeh Mangpa Jesu khu atungah atuong ta hi. Jerusalem alut tah in mi tampi in apuonte uh lampi ah apha ua, adangten zong gamlah a sawlbawhte satin lampi ah pha in, tuachi’n amailam a peite leh anua lam a zuiten “Hosanna! Mangpa min a hingpei ahampha hi!...Tungnung pen ah, Hosanna,” chiin akikou uhi.

2.Leeng Jesu Khu:

Israel mite khun Mangpa Jesu khu tam khovel a leeng/king banga galthuom thupitah te toh hing pei dingin ana lamet uhi. Tuaziehin Mang Jesu Leeng ahina khu khovel leeng leh lal loupe tahtah te bang ding leh agalte uapat amaute thagum-thatang toh hunkhetu hiding in ana ngaituo uhi. I Mangpa Jesu Jerusalem a alut masang kum 150 masang lai akhun Simon Maccabaeus kichi khu Jerusalem a Israel gal/enemies te azawziehin thupi tah in ana lut a, tuaziehin mipite’n tumnate pha leh awngaitah a kikou in ‘Mangpa min a hingpei ahampha hi’ ana chi uhi.

Mangpa Jesu leh Simon Maccabaeus ban ah leeng dangte kikhietna bang ahidiei? Simon Maccabaeus khun agalte khu galkap thahatna leh thagum-thatang toh ana zou hi. Hinanleh Mang Jesu khun koima mudalou, gal bangma satlou, koima thatlou nanleh thupitah in Jerusalem lut hi. Mangpa Jesu khu mihing anuoi/million a simte lungsim luodim tu Leeng umsun khu ahi. Bang chidan a tambang a mizousie itna ana muthei adiei?

3. Itna leh Kingiemkhietna Leeng Jesu:

Mathiu 26: 52 a Mangpa Jesu manding a ahing kuon lai un ama umpite khat in anamsau adohkhie a, siempulien suohpa bil asatkhieth pieh hi. Tuanah Mang Jesu'n, "Na namsau apai ah siet kia in, namsau pan poumate namsau ma a shiding ahizieh in," chi hi. Khovel a leeng leh lalte khu saipi/elephant ahiei sakol/horses te ah tuongin agalte uh dou uhi, nanleh Mangpa Jesu khu sabiltung tungah tuong in guolzoutu Leengpa hiveve hi.

I Mangpa Jesu hinkhuo akhun 'sabiltung' khun poimawna lienpi nei hi. Mangpa Jesu lei a ahingpien lai in gan annkuong kiim lah a ganhon te lah a sabiltung zong ana umngei tham ding hi. Zecharia 9: 9-10 gen bangin Mang Jesu'n ashiding kuon mama in zong Jerusalem alut nading in sabiltung ngen kia hi. "Aw Zion tanu nasatah in nuom in, Jerusalem tanu aw ngaitah in kikou in, En in na leengpa na kungah ahing pei hi, Ama khu adih a, hundamna zong anei hi; Kingiangiem tah in, sabiltung nou tungah tuongin, sabiltung nou ngei a tuongin ahing pei hi. Ephraim apat sakollengte leh, Jerusalem apat sakolte ka sattan dinga, kidouna thalpite sattan in a um ding hi. Aman namte kungah lemna thu agen dinga, agam tuipi akipat tuipi dong ahi ding a; Tualeh luipi akipat leitung tawp dong ahi ding hi."

Sabiltung khu lemna/muonna, nunnemna leh kingiemkhietna ensah ganta ahi chi'n mite'n thei uhi. Mangpa Jesu ngei khu tuabang a nunnem leh kingiemkhiet leengpa, kilemtah a hingpei, lemna akidim Pasion Leenggam tungding dinga hing pei khu ahi hi. Tuazieh in khumbang hiina nei ganta kingiemkhietta khu Mangpa'n tulmaw hi.

Tangthu khat akhun iMangpa Jesu khovel a ahingpien lai in ganta tuomtuomte khu Mang Jesu gei a umding ana ut chiet uhi. Tuanah humpibahnei khun "Khovel vaihawmtu khu kahumbit nuom hi. Akung nai a hingpei pouma kabottel ding hi" chi hi. Agei ua um Vansawlsieng khun "Thu naneituoh seng hi" chi hi. Tuachi'n si-al/fox khun "Nausen Jesu kapanpi nading in ahnou/chiken khat zingkal chin in kagu dinga nawitui humtah ateepthei zing na dingin anu kungah kape zel ding" chi hi. Vansawlsieng khun "Na pilkhel/cunning seng hi" chisan kia hi. Tuabangzel in ganta/gamsa tuomtuom te'n adeidan uh/angaidan uh tuomtuom agenchieth ua, nanleh vansawlsieng khun koima thugen lemsahpieh lou hi. Atawpna ah vansawlsiengkhuon lou nnasem mikhat toh nnasem a um sabiltung khat mu hi. Khum sabiltung kungah vansawlsieng khun "Nang bang napethei diei?" chi'n dong a, tuanah sabiltung khun "Bangma bawlpieh thei kanei sih hi! Keipen vuoh leh sat thuothei bep a hinkhuo zang kahi ziehin, vuoh leh sat thuohna ding a umleh ka Mangpa

tang a thuoh dingin mansan ka um” chi’n dawng hi. Tuachi’n vansawlsieng khun “Nang khu Mang Jesu panpi theipen ding khu nahi” chi hi.

Tami tangthu tungtawn akhun ganta dang tengteng lunggel leh ngaituodan khu khovel mihing nang leh kei lunggel leh ngaituona dan zong ahi hi. Khatvei George Bernard Shaw khu mikhat in “Sabiltung” chi’n han hi. Bernard Shaw khu alungthah sih a, mite’n bangzieh a lungthah lou nahiei chia adoh lai un aman, “Sabiltung in hiina tampi nei hi, nunnemna, nasep kukalna, hiina bangbang a lungkimtheina, vuoh leh sat thuohsah tute lethuh/revenge lounate nei hi; tambang hiina hoitah nei toh ahing kigente leh bangchi’n kalung thah thei diei?” chi’n dawng kichi hi. Mangpa Jesu’n Hagau mangthaite matna dingin sabiltung sese tulmaw nawnlou hi. Nanleh nunnem leh kingiemkhietna hinkhuo zang mite khu tulmaw zing hi.

Tulai in igam uah/igingtu hinkhuo zahna uah iMangpa Jesu’n anei nunnemna leh kingiemkhietna hinkhuo khu inei ding ua sil poimaw mama khu ahizing hi. Khum khu Mangpa’n ahinkhuo zahdan ah eite hing zilsah hi. Mangpa Jesu lamzawt khu kingiemkhietna lampi zui khu ahizaw hi. St. Augustine kunga mikhenkhatte’n, “Khrstian te’n athei masat ding ua poimaw bang amah?” chia adoh un aman, “Kingiemkhietna” chi hi. “Anina bang ahidiei?” chi’n dong kia ua, tuanah aman, “Kingiemkhietna” chi kia hi. “Ahileh athumna pen lah?” chia adoh u’leh “Kingiemkhietna” chi’n dawng kia kichi hi. I Mangpa Jesu aki ngiemkhiet bang a anuazui gingtute zong ikingiemkhiet ding uh ahi hi. Sawltah Paul in zong kingiemkhietna poimaw dan thei in, Khrstian ahing kisuo tunglai CE 59 lai vel in, Paul in ama tungtang gen in, “Sawltah kichi ding in kaching zousih hi,” chi hi. Hun peizel ah Paul khu gingu hinkhuo a pichinna ahingnei tou lai CE 64 lai in, “Misiengthou te lah a neu penpen sangin ka neu zaw hi,” chi a, ahinkhuo nualam CE 65 vel akhun, “Mikhielte lah a khielpen khu kahi,” chi hi.

4.Thukhumsin:

I Mangpa Jesu khun tuabang a mi kingiemkhiet mama te khu azangnuom a, tualeh lamdangtah leh thupitah inzong zangzel hi. Eite zong iMangpa adinga zahtah ihi nuom u’leh nunnemna leh kingiemkhietna puonsil/garments te toh ikithuom uh poimaw ding hi. Tuni’n “Mangpa’n ahing tulmaw hi” ichi thei ding uoi? Apuonsilte uh lampi a pha mipite leh ahang chienga awngaitah a “Hosanna” chia kikou zel leh ahang chienga “Khailia un” chizel mite lah a pansang in, “Mangpa’n ahing tulmaw hi” chizaw thei lei ahoizaw tham hi.

Mangpa’n simtute guol hingzawl hen.